

საქართველოს კანონი

ენერგო ეტიკეტირების შესახებ

თავი I. ზოგადი დებულებები

მუხლი 1. კანონის მიზანი

1. ამ კანონის მიზანია საქართველოს ბაზარზე განთავსებული ან/და საქართველოში ექსპლუატაციაში გაშვებული ენერგომომხმარებელი პროდუქტის მიერ ენერგიისა და სხვა რესურსების მოხმარების და ასევე, ასეთი პროდუქტის ენერგომომხმარების მაჩვენებლების შესახებ პროდუქტზე სტანდარტული ინფორმაციის მითითების უზრუნველყოფა, აგრეთვე, საქართველოს ბაზარზე განთავსებული ან/და საქართველოში ექსპლუატაციაში გაშვებული ენერგომომხმარებელი პროდუქტის ამ კანონითა და შესაბამისი ტექნიკური რეგლამენტებით განსაზღვრულ მოთხოვნებთან შესაბამისობის უზრუნველყოფა.

მუხლი 2. კანონის მოქმედების სფერო

1. ამ კანონის მოქმედება ვრცელდება საქართველოს მთავრობის ტექნიკური რეგლამენტებით (შემდგომში ტექნიკური რეგლამენტები) განსაზღვრულ ენერგომომხმარებელ პროდუქტებზე, რომლებიც მოხმარებისას პირდაპირ ან არაპირდაპირ მნიშვნელოვან ზეგავლენას ახდენენ ენერგიის ან ამ კანონით განსაზღვრული სხვა არსებითი რესურსების მოხმარებაზე;
2. ამ კანონის მოქმედება არ ვრცელდება:
 - ა) მეორად პროდუქტზე;
 - ბ) სატრანსპორტო საშუალებებზე, რომლებიც გამოიყენება გადაყვანა/გადაზიდვისთვის;
 - გ) პროდუქტის საპასპორტო მონაცემებზე ან სხვა ეკვივალენტურ ინფორმაციაზე, რომლებიც პროდუქტის უსაფრთხოების მიზნით დაიტანება პროდუქტზე.

მუხლი 3. ტერმინთა განმარტება

1. ამ კანონის მიზნებისათვის, მასში გამოყენებულ ტერმინებს აქვს შემდეგი მნიშვნელობა:
 - ა) **ენერგომომხმარებელი პროდუქტი** (შემდგომში პროდუქტი)- ტექნიკური რეგლამენტებით გათვალისწინებული ნებისმიერი პროდუქტი, რომელიც გამოყენებისას მოიხმარს ენერგიას და რომელიც განთავსებულია საქართველოს ბაზარზე ან გაშვებულია ექსპლუატაციაში საქართველოს ტერიტორიაზე; ასევე ენერგომომხმარებელი პროდუქტის ის ნაწილები, რომლებიც ინდივიდუალურად განთავსებულია ბაზარზე ან/და გაშვებულია ექსპლუატაციაში საბოლოო

მომხმარებლებისთვის და რომელთა ეკოლოგიური მაჩვენებლები შესაძლებელია შეფასდეს დამოუკიდებლად;

ბ) **ფიშე** - პროდუქტის შესახებ სტანდარტული ინფორმაციის ცხრილი, რომელშიც, მათ შორის, ასახული უნდა იყოს: მიმწოდებლის სახელწოდება ან სასაქონლო ნიშანი; მიმწოდებლის მოდელის იდენტიფიკატორი (კოდი), რომელიც ჩვეულებრივ ანბანურ-ციფრულია და რომლითაც ხდება ერთი და იმავე სასაქონლო ნიშნისა თუ მიმწოდებლის სახელწოდების მქონე მოდელებისგან კონკრეტული მოდელის გამორჩევა; ენერგოეფექტურობის კლასი ;

გ) **სხვა არსებითი რესურსები** - წყალი, ქიმიკატები და სხვა ნივთიერებები, რომლებსაც პროდუქტი ჩვეულებრივ გამოყენებისას მოიხმარს;

დ) **დამატებითი ინფორმაცია** - ინფორმაცია პროდუქტის ექსპლუატაციისა და მახასიათებლების შესახებ, რომლებიც დაკავშირებულია ან სასარგებლოა პროდუქტის მიერ ენერგიის ან სხვა არსებითი რესურსების გამოყენების შესაფასებლად და რომლებიც ეფუძნება გაზომვად მონაცემებს;

ე) **ეტიკეტი** - გრაფიკული დიაგრამა, დაბეჭდილი ან ელექტრონული ფორმით, რომელსაც გააჩნია დახურული შკალა ლათინური ასოების „A“-დან „G“-ის ჩათვლით, სადაც თითოეული ასო ასახავს კლასს და თითოეული კლასი შეესაბამება ენერგიის დაზოგვის მაჩვენებელს და რომელიც წარმოდგენილია შვიდი ფერით მუქი მწვანიდან წითლამდე, იმისთვის რათა მომხმარებელს ჰქონდეს ინფორმაცია პროდუქტის ენერგოეფექტიანობის და ენერგიის მოხმარების შესახებ.

ვ) **პირდაპირი გავლენა** - პროდუქტების გავლენა, რომლებიც რეალურად მოიხმარენ ენერგიას გამოყენების დროს;

ზ) **არაპირდაპირი გავლენა** - იმ პროდუქტების გავლენა, რომლებიც არ მოიხმარენ ენერგიას, მაგრამ ხელს უწყობენ გამოყენებისას ენერგიის დაზოგვას;

თ) **მიმწოდებელი** - მწარმოებელი, ან მისი ავტორიზებული წარმომადგენელი საქართველოში ან იმპორტიორი, რომელიც განათავსებს ან ექსპლუატაციაში უშვებს პროდუქტს საქართველოს ბაზარზე; მათი არ არსებობის შემთხვევაში, მიმწოდებლად მიიჩნევა ნებისმიერი ფიზიკური ან იურიდიული პირი, რომელიც პროდუქტს ათავსებს საქართველოს ბაზარზე ან უშვებს ექსპლუატაციაში;

ი) **დილერი** - საცალო მოვაჭრე ან სხვა პირი, რომელიც ყიდის (მათ შორის დისტანციურად), აქირავებს, იჯარით/ლიზინგით გასცემს ან განათავსებს პროდუქტს საბოლოო მომხმარებლისთვის.

კ) **ავტორიზებული წარმომადგენელი** - ფიზიკური ან იურიდიული პირი, რომელსაც მწარმოებლისგან მიღებული აქვს მინდობილობა იმოქმედოს მწარმოებლის სახელით, მინდობილობით განსაზღვრულ კონკრეტულ შემთხვევებში;

ლ) **იმპორტიორი** - ფიზიკური ან იურიდიული პირი, რომელიც პასუხისმგებელია სხვა ქვეყანაში წარმოებული პროდუქტის ბაზარზე განთავსებისათვის.

მ) **ბაზარზე განთავსება** - საქართველოს ტერიტორიაზე პროდუქტის ბაზარზე პირველადი მიწოდება წარმოების, იმპორტის, იჯარის, ლიზინგის ან სხვა გზით, კომერციული ან არაკომერციული მიზნებისათვის;

ნ) **ექსპლუატაციაში გაშვება** - საქართველოში პროდუქტის პირველად გამოყენება დანიშნულებისამებრ.

ო) **ბაზარზე ზედამხედველობის ორგანო** – საჯარო სამართლის იურიდიული პირი ენერგოეფექტურობის სააგენტო;

პ) **ბაზარზე ზედამხედველობა** - ბაზარზე ზედამხედველობის ორგანოს მიერ განხორციელებული იმ ქმედებებისა და ზომების ერთობლიობა, რომელიც ადგენს პროდუქტის კანონმდებლობით განსაზღვრულ მოთხოვნებთან შესაბამისობას.

ჟ) **დოკუმენტური შემოწმება** - ენერგომომხმარებელ პროდუქტთან დაკავშირებული დოკუმენტების საქართველოს კანონმდებლობასთან შესაბამისობის შემოწმება;

რ) **ტექნიკური შემოწმება** - პროდუქტის ნიმუშების ტექნიკური შემოწმება/გამოცდა მათი საქართველოს კანონმდებლობასთან შესაბამისობის დადგენის მიზნით;

ს) **საბოლოო მომხმარებელი** - მომხმარებელი, რომელიც ამ კანონითა და ტექნიკური რეგლამენტებით განსაზღვრულ პროდუქტს სარეალიზაციოდ არ იყენებს;

ტ) **შემოსავლების სამსახური** - საქართველოს ფინანსთა სამინისტროს მმართველობის სფეროში შემავალი საჯარო სამართლის იურიდიული პირი;

უ) **ენერგოეფექტურობის სააგენტო** - საქართველოს ეკონომიკისა და მდგრადი განვითარების სამინისტროს მმართველობის სფეროში შემავალი საჯარო სამართლის იურიდიული პირი.

თავი II. ინფორმაციის მიწოდებისა და მიმწოდებლის/დილერის ვალდებულებები

მუხლი 4. საბოლოო მომხმარებლისთვის ინფორმაციის მიწოდება

1. პროდუქტის მიერ ელექტროენერგიის, ენერგიის სხვა წყაროებისა და, შესაბამის შემთხვევებში, სხვა არსებითი რესურსების მოხმარების შესახებ ინფორმაცია და დამატებითი ინფორმაცია პროდუქტის ნებისმიერი ფორმით სასყიდლით ან უსასყიდლოდ მიწოდებისას (მათ შორის დისტანციურად გაყიდვისას) ან გასაყიდად განთავსებისას ფიშესა და ეტიკეტის მეშვეობით უნდა მიეწოდოს საბოლოო მომხმარებლებს;
2. ამ მუხლის პირველ პუნქტში გათვალისწინებული ინფორმაცია ჩასაშენებელი ან დასამონტაჟებული პროდუქტისათვის უზრუნველყოფილი უნდა იყოს შესაბამისი ტექნიკური რეგლამენტით გათვალისწინებულ შემთხვევებში;
3. პროდუქტის სპეციფიური მოდელის ნებისმიერი სახის რეკლამა, რომელიც შეიცავს ინფორმაციას პროდუქტის ფასის ან ენერგომომხმარებლის შესახებ, უნდა მოიცავდეს ინფორმაციას ამ მოდელის ენერგოეფექტურობის კლასის შესახებაც;
4. პროდუქტთან დაკავშირებული ნებისმიერი ტექნიკური ხასიათის მასალა, რომელიც განკუთვნილია პროდუქტის რეალიზაციის ხელშეწყობისათვის და აღწერს პროდუქტის სპეციფიურ ტექნიკურ პარამეტრებს, კერძოდ, ტექნიკური სახელმძღვანელოები და მწარმოებლების ბროშურები, მიუხედავად მათი ბეჭდური თუ ელექტრონული ფორმისა, უნდა მიეწოდოს საბოლოო მომხმარებლებს და მათში ასახული უნდა იყოს თუ რა მოცულობის ენერგიას მოიხმარს პროდუქტი ან ენერგოეფექტურობის კლასი;

5. ამ კანონითა და შესაბამისი ტექნიკური რეგლამენტებით განსაზღვრულ პროდუქტებზე დაუშვებელია განსხვავებული დიზაინის, სიმბოლოების ან წარწერების მქონე ეტიკეტის განთავსება, რომელიც არ შეესაბამება ამ კანონითა და შესაბამისი ტექნიკური რეგლამენტებით გათვალისწინებულ მოთხოვნებს, და შეუძლია შეცდომაში შეიყვანოს ან დააბნიოს საბოლოო მომხმარებელი პროდუქტის მიერ ენერგიის ან სხვა მნიშვნელოვანი რესურსების გამოყენების თაობაზე.

მუხლი 5. მიმწოდებლის ვალდებულებები

1. მიმწოდებელი, რომელიც ბაზარზე განათავსებს ან ექსპლუატაციაში გაუშვებს პროდუქტს, ვალდებულია უზრუნველყოს პროდუქტთან ერთად ეტიკეტისა და ფიშეს მიწოდება, რომელთა ფორმა და შინაარსი დამტკიცებულია შესაბამისი ტექნიკური რეგლამენტებით.
2. მიმწოდებელი ვალდებულია აწარმოოს ტექნიკური დოკუმენტაცია, რომელიც საკმარისია ფიშესა და ეტიკეტზე ასახული ინფორმაციის სიზუსტის შესაფასებლად. ტექნიკური დოკუმენტაცია უნდა მოიცავდეს:
 - ა) პროდუქტის ზოგად აღწერილობას;
 - ბ) შესაბამის შემთხვევაში პროექტირებისას განხორციელებული გაანგარიშებების შედეგებს;
 - გ) ტესტირების ანგარიშებს, მათ შორის, სადაც შესაძლებელია შესაბამისი აკრედიტებული ორგანიზაციების მიერ შემუშავებულ ანგარიშებს;
 - დ) როდესაც პროდუქტის მახასიათებლები გამოყენებულია მსგავსი მოდელებისათვის, შესაბამის მითითებებს, რომლებიც უზრუნველყოფს ამ მოდელების იდენტიფიცირებას.
3. მიმწოდებელი ვალდებულია ზედამხედველობის მიზნებისათვის უზრუნველყოს ტექნიკური დოკუმენტაციის ხელმისაწვდომობა ბოლო პროდუქტის წარმოების დღიდან ხუთი წლის განმავლობაში. მიმწოდებელი უზრუნველყოფს ენერგოეფექტურობის სააგენტოსთვის ტექნიკური დოკუმენტაციის ელექტრონული ვერსიის მიწოდებას, აღნიშნული სააგენტოს მხრიდან წერილობითი მოთხოვნის მიღებიდან 10 სამუშაო დღის განმავლობაში;
4. მიმწოდებელი ვალდებულია დილერებს უფასოდ მიაწოდოს პროდუქტთან დაკავშირებული ამ კანონითა და შესაბამისი ტექნიკური რეგლამენტებით გათვალისწინებული ეტიკეტები და ინფორმაცია პროდუქტის შესახებ. მიმწოდებელმა დილერებს ეტიკეტები უნდა მიაწოდოს მოთხოვნისთანავე. მიმწოდებელი თავად განსაზღვრავს მიწოდების გზას;
5. მიმწოდებელი ვალდებულია ეტიკეტებთან ერთად უზრუნველყონ პროდუქტის ფიშეს მიწოდება დილერებისთვის;
6. მიმწოდებელი ვალდებულია უზრუნველყოს, რომ პროდუქტის შესახებ არსებული ყველა ბროშურა მოიცავდეს პროდუქტის ფიშესაც, ხოლო ბროშურების არარსებობის შემთხვევაში

მიმწოდებელი უზრუნველყოფს პროდუქტის ფიშეს ასახვას პროდუქტთან დაკავშირებულ სხვა მასალაში;

7. მიმწოდებელი პასუხისმგებელია მის მიერ მიწოდებული ფიშესა და ეტიკეტზე დატანილი ინფორმაციის სიზუსტეზე; ამ მუხლის მე-2 პუნქტით განსაზღვრული ეტიკეტსა და ფიშეზე დატანილი ინფორმაცია ითვლება ამ კანონისა და ტექნიკური რეგლამენტებით გათვალისწინებული მოთხოვნების შესაბამისად, თუკი არ არსებობს საწინააღმდეგოს დამადასტურებელი მტკიცებულება.
8. ეტიკეტზე ან ფიშეზე დატანილი ინფორმაციის გამოსაქვეყნებლად მიმწოდებლის თანხმობა საჭირო არ არის;
9. მიმწოდებელი ვალდებულია დააკმაყოფილოს პროდუქტების ბაზარზე განთავსებისათვის აუცილებელი, ამ კანონითა და შესაბამისი ტექნიკური რეგლამენტებით განსაზღვრული მოთხოვნები.
10. მიმწოდებელი ვალდებულია ითანამშრომლოს ენერგოეფექტურობის სააგენტოსთან ბაზარზე ზედამხედველობის განხორციელების პროცესში.

მუხლი 6. დილერის ვალდებულებები

1. საბოლოო მომხმარებელზე პროდუქტის ნებისმიერი ფორმით მიწოდებისას დილერი ვალდებულია თვალსაჩინოდ განათავსოს ეტიკეტი და უზრუნველყოს, რომ პროდუქტის თანმხლები დოკუმენტაცია ან ბროშურა მოიცავდეს პროდუქტის ფიშესაც;
2. როდესაც დილერი ახდენს შესაბამისი ტექნიკური რეგლამენტებით გათვალისწინებული პროდუქტის გასაყიდად განთავსებას, ის ვალდებულია უზრუნველყოს პროდუქტზე განთავსებული ეტიკეტის თვალსაჩინოება;
3. დილერი ვალდებულია დააკმაყოფილოს პროდუქტების ბაზარზე განთავსებისათვის აუცილებელი, ამ კანონითა და შესაბამისი ტექნიკური რეგლამენტებით განსაზღვრული მოთხოვნები.
4. დილერი ვალდებულია ითანამშრომლოს ენერგოეფექტურობის სააგენტოსთან ბაზარზე ზედამხედველობის განხორციელების პროცესში.

მუხლი 7. პროდუქტის თავისუფალი მიმოქცევა

1. დაუშვებელია ამ კანონისა და ტექნიკური რეგლამენტებით გათვალისწინებული მოთხოვნების შესაბამისი პროდუქტის საქართველოში ბაზარზე განთავსებისა თუ ექსპლუატაციაში გაშვების აკრძალვა, შეზღუდვა ან რაიმე სახით ხელშეშლა, გარდა იმ შემთხვევებისა, თუ პროდუქტი

საფრთხის შემცველია სიცოცხლისთვის, ჯანმრთელობისთვის, საკუთრებისთვის, გარემოსთვის ან/და თუ პროდუქტი ეწინააღმდეგება კანონმდებლობით დადგენილ სხვა მოთხოვნებს;

2. მიმწოდებლები ვალდებული არიან უზრუნველყონ ეტიკეტზე და ფიშეზე დატანილი ინფორმაციის სიზუსტის დამადასტურებელი მტკიცებულებების წარმოდგენა ამ კანონის მე-5 მუხლის შესაბამისად;
3. თუ სსიპ შემოსავლების სამსახური ფლობს ინფორმაციას, საქართველოს ტერიტორიაზე ამ კანონისა და შესაბამისი ტექნიკური რეგლამენტებით გათვალისწინებული მოთხოვნების შეუსაბამო ეტიკეტების მქონე ან არაეტიკეტირებული პროდუქტის შემოტანის შესახებ, ვალდებულია, მიიღოს ყველა შესაძლო ზომა ასეთი პროდუქტის საქართველოს ტერიტორიაზე დაუშვებლობის შესახებ და აღნიშნულის თაობაზე დაუყოვნებლივ აცნობოს ენერგოეფექტურობის სააგენტოს.

თავი III. სახელმწიფო ზედამხედველობა

მუხლი 8. ბაზარზე ზედამხედველობა

1. პროდუქტის ამ კანონითა და შესაბამისი ტექნიკური რეგლამენტებით განსაზღვრულ მოთხოვნებთან შესაბამისობაზე ზედამხედველობას ახორციელებენ შემოსავლების სამსახური და ენერგოეფექტურობის სააგენტო.
2. ენერგოეფექტურობის სააგენტო ზედამხედველობას ახორციელებს დოკუმენტური და ტექნიკური შემოწმებით ამ კანონითა და საქართველოს მთავრობის დადგენილების შესაბამისად. ენერგოეფექტურობის სააგენტო უფლებამოსილია მოითხოვოს ნებისმიერი დოკუმენტაცია ამ კანონისა და ტექნიკური რეგლამენტების მოთხოვნების შესაბამისობის დადგენის მიზნით;
3. თუ ნიმუშების დოკუმენტური შემოწმებისას დადგინდა, რომ ზედამხედველობას დაქვემდებარებული პროდუქტი არ შეესაბამება ამ კანონითა და შესაბამისი ტექნიკური რეგლამენტებით გათვალისწინებულ მოთხოვნებს, ენერგოეფექტურობის სააგენტო უფლებამოსილია მიმწოდებელს/დილერს მისცეს მითითება და შეუსაბამობის აღმოფხვრისთვის განუსაზღვროს 5 სამუშაო დღის ვადა. აღნიშნული ვადის გასვლის შემდეგ, ენერგოეფექტურობის სააგენტო ვალდებულია განმეორებით ჩაატაროს ნიმუშის დოკუმენტური შემოწმება.
4. თუ განმეორებითი შემოწმების დროს აღმოჩნდა, რომ მიმწოდებელს/დილერს არ აღმოუფხვრია შეუსაბამობა, ენერგოეფექტურობის სააგენტო უფლებამოსილია შეუჩეროს მიმწოდებელს/დილერს პროდუქტის რეალიზაცია შეუსაბამობის აღმოფხვრამდე;
5. თუ მიმწოდებელი/დილერი რეალიზაციის შეჩერების შესახებ გადაწყვეტილების მიუხედავად აგრძელებს პროდუქტის რეალიზაციას, მას დაეკისრება პასუხისმგებლობა ამ კანონის შესაბამისად;

6. პროდუქტის ტექნიკური შემოწმება ხორციელდება საქართველოს ტერიტორიაზე, საბაჟო კონტროლის ზონებში და პროდუქტის რეალიზაციის ადგილებში პროდუქტის ნიმუშების ტექნიკური შემოწმებით ან/და აღნიშნული ადგილებიდან აღებული ნიმუშების შემოწმების/გამოცდის გზით, რომელიც ფორმდება შემოწმების ოქმით.
7. ბაზარზე ამ კანონითა და შესაბამისი ტექნიკური რეგლამენტებით გათვალისწინებული პროდუქტის ზედამხედველობისას ენერგოეფექტურობის სააგენტო უფლებამოსილია შეამოწმოს როგორც მთლიანად პროდუქტის ყველა მახასიათებელი, ასევე, მისი ცალკეული კომპონენტი ან მახასიათებელი, რომლის თაობაზეც იგი ფლობს ინფორმაციას შესაძლო შეუსაბამობის შესახებ ან გააჩნია დასაბუთებული ეჭვი.
8. მიმწოდებელი/დილერი ვალდებულია ენერგოეფექტურობის სააგენტოს მოთხოვნის საფუძველზე მიაწოდოს ამ მუხლის მე-6 პუნქტით გათვალისწინებული ნიმუში/ნიმუშები, რომლის შესყიდვის ხარჯს ანაზღაურებს ენერგოეფექტურობის სააგენტო, და ასევე ამ მუხლის მე-2 პუნქტით გათვალისწინებული დოკუმენტაცია.
9. ენერგოეფექტურობის სააგენტო უფლებამოსილია ფარულად განახორციელოს ზედამხედველობას დაქვემდებარებული პროდუქტის შესყიდვა თუ აღნიშნული ხელს შეუწყობს პროდუქტის ამ კანონითა და შესაბამისი ტექნიკური რეგლამენტებით გათვალისწინებულ მოთხოვნებთან შეუსაბამობის დროულ აღმოჩენასა და გამოვლენას. ამ მუხლის მე-8 და მე-9 პუნქტებით გათვალისწინებული შესყიდვებისას არ ვრცელდება „სახელმწიფო შესყიდვების შესახებ“ საქართველოს კანონის მოთხოვნები;
10. თუ ნიმუშების ტექნიკური შემოწმებისას დადგინდა, რომ ზედამხედველობას დაქვემდებარებული პროდუქტი არ შეესაბამება ამ კანონითა და შესაბამისი ტექნიკური რეგლამენტებით გათვალისწინებულ მოთხოვნებს, მიმწოდებელი/დილერი ვალდებულია სრულად აანაზღაუროს ენერგოეფექტურობის სააგენტოს მიერ გაწეული ხარჯები;
11. თუ ტექნიკური შემოწმებისას გამოვლინდა შეუსაბამობა, ენერგოეფექტურობის სააგენტო უფლებამოსილია მიმწოდებელს/დილერს მისცეს მითითება და შეუსაბამობის აღმოფხვრისთვის განუსაზღვროს 5 სამუშაო დღის ვადა. აღნიშნული ვადის გასვლის შემდეგ, ენერგოეფექტურობის სააგენტო ვალდებულია განმეორებით შეამოწმოს ტექნიკური შემოწმებისას დადგენილი მახასიათებლების სრული შესაბამისობა პროდუქტის ეტიკეტთან და ფიშესთან;
12. თუ განმეორებითი შემოწმების დროს აღმოჩნდა, რომ მიმწოდებელს/დილერს არ აღმოუფხვრია შეუსაბამობა, ენერგოეფექტურობის სააგენტო უფლებამოსილია შეუჩეროს მიმწოდებელს/დილერს პროდუქტის რეალიზაცია შეუსაბამობის აღმოფხვრამდე.
13. თუ მიმწოდებელი/დილერი რეალიზაციის შეჩერების შესახებ გადაწყვეტილების მიუხედავად აგრძელებს პროდუქტის რეალიზაციას, მას დაეკისრება პასუხისმგებლობა ამ კანონის შესაბამისად.
14. ამ მუხლის მე-3 და მე-11 პუნქტებით გათვალისწინებული მითითება და მე-4 და მე-12 პუნქტებით გათვალისწინებული გადაწყვეტილება, რომელიც მიიღება დადგენილების სახით,

სავალდებულოა შესასრულებლად. დადგენილების გასაჩივრება არ აჩერებს მის აღსრულებას. მითითების და დადგენილების შესრულების კონტროლს ახორციელებს ენერგოეფექტურობის სააგენტო;

15. შემოსავლების სამსახური უფლებამოსილია განახორციელოს დოკუმენტური შემოწმება და ამ მიზნით მოითხოვოს ამ კანონის მე-5 მუხლის მე-2 პუნქტით განსაზღვრული პროდუქტთან დაკავშირებული ტექნიკური დოკუმენტაცია. შემოსავლების სამსახური უფლებამოსილია მიმწოდებელს გამოვლენილი შეუსაბამობის აღმოსაფხვრელად განუსაზღვროს გონივრული ვადა, ხოლო თუ აღნიშნულ ვადაში მიმწოდებლის მიერ არ მოხდება შეუსაბამობის აღმოფხვრა, შემოსავლების სამსახური უფლებამოსილია მიიღოს გადაწყვეტილება პროდუქტის საქართველოს ტერიტორიაზე არ დაშვების შესახებ.

თავი IV: პასუხისმგებლობა

მუხლი 9. მიმწოდებლისა და დილერის პასუხისმგებლობა

1. მიმწოდებლის/დილერის მიერ ენერგოეფექტურობის სააგენტოსთვის ბაზარზე განთავსებული პროდუქტის ზედამხედველობის პროცესის ხელის შეშლა - გამოიწვევს დაჯარიმებას 1000 ლარის ოდენობით;
2. მიმწოდებლის/დილერის მიერ პროდუქტის რეალიზაციის შეჩერების შესახებ ენერგოეფექტურობის სააგენტოს დადგენილების შეუსრულებლობა - გამოიწვევს დაჯარიმებას 5000 ლარის ოდენობით;
3. ამ მუხლით გათვალისწინებული ჯარიმები დამრღვევმა უნდა გადაიხადოს დაჯარიმების შესახებ გადაწყვეტილების ჩაბარებიდან 30 კალენდარული დღის ვადაში. ჯარიმის გადახდის დამადასტურებელი ქვითარი დამრღვევმა ენერგოეფექტურობის სააგენტოს უნდა წარუდგინოს გადახდიდან 5 სამუშაო დღის ვადაში. ჯარიმის გადახდის დამადასტურებელი ქვითრის წარდგენა ასევე შესაძლებელია ელექტრონული ფორმით.
4. მიმწოდებელს/დილერს დაკისრებული ჯარიმის გადაუხდელობის შემთხვევაში, დადგენილი ვადის გასვლის შემდგომ, დაეკისრება საურავი თითოეულ ვადაგადაცილებულ დღეზე ჯარიმის დადგენილი თანხის 0.01% ოდენობით;
5. ამ მუხლით გათვალისწინებული ჯარიმებისა და საურავის გადაუხდელობის შემთხვევაში დაჯარიმების შესახებ დადგენილება დაუყოვნებლივ მიექცევა აღსასრულებლად „სააღსრულებო წარმოებათა შესახებ“ საქართველოს კანონის შესაბამისად.

მუხლი 10. დასკვნითი დებულებები

1. საქართველოს მთავრობამ 2020 წლის 31 დეკემბრამდე უნდა უზრუნველყოს საქართველოს ეკონომიკისა და მდგრადი განვითარების სამინისტროს მიერ შემუშავებული შემდეგი ტექნიკური რეგლამენტების პროექტების დამტკიცება:

ა)საყოფაცხოვრებო მოხმარების ჭურჭლის სარეცხი მანქანების ენერგო ეტიკეტირების წესთან დაკავშირებით;

ბ)საყოფაცხოვრებო მოხმარების სამაცივრე მოწყობილობების ენერგო ეტიკეტირების წესთან დაკავშირებით;

გ)საყოფაცხოვრებო მოხმარების სარეცხი მანქანების ენერგო ეტიკეტირების წესთან დაკავშირებით;

დ)ტელევიზორების ენერგო ეტიკეტირების წესთან დაკავშირებით;

ე)საყოფაცხოვრებო მოხმარების ჰაერის კონდიციონერების ენერგო ეტიკეტირების წესთან დაკავშირებით;

2. საქართველოს მთავრობამ 2021 წლის 30 აპრილამდე უნდა უზრუნველყოს საქართველოს ეკონომიკისა და მდგრადი განვითარების სამინისტროს მიერ შემუშავებული შემდეგი ტექნიკური რეგლამენტების პროექტების დამტკიცება:

ა)საყოფაცხოვრებო მოხმარების სამზარეულო ღუმელებისა და გამწოვების ენერგო ეტიკეტირების წესთან დაკავშირებით;

ბ) მტვერსასრუტების ენერგო ეტიკეტირების წესთან დაკავშირებით;

გ) წყლის გამათბობლების, ცხელი წყლის ავზების და წყლის გამაცხელებლისა და მზის პანელების კომპლექტების ენერგო ეტიკეტირების წესთან დაკავშირებით;

დ) გამათბობლების, გამათბობლების კომპლექტების, ტემპერატურის კონტროლის მზის პანელებისა და გამათბობლის კომბინირებული კომპლექტების, ტემპერატურის კონტროლისა და მზის პანელების ენერგო ეტიკეტირების წესთან დაკავშირებით;

ე) ელექტრო ნათურებისა და სანათების ენერგო ეტიკეტირების წესთან დაკავშირებით;

ვ) საყოფაცხოვრებო მოხმარების საშრობი მანქანების ენერგო ეტიკეტირების წესთან დაკავშირებით;

ზ) საყოფაცხოვრებო მოხმარების კომბინირებული სარეცხი-საშრობი მანქანების ენერგო ეტიკეტირების წესთან დაკავშირებით.

მუხლი 11. გარდამავალი დებულებები

1. ეს კანონი, გარდა ამ კანონის პირველი - მე-9 მუხლებისა ამოქმედდეს გამოქვეყნებისთანავე;
2. ამ კანონის პირველი - მე-9 მუხლები ამოქმედდეს 2020 წლის 31 დეკემბრიდან.